

五台山沙門道殿集

顯密圓通成佛心要集

南京金陵刻經處印行

五台山沙門道殷集

顯密圓通成佛心要集

金陵刻經處印行



顯密圓通成佛心要集序

宣政殿學士金紫榮祿大夫行給事中知武定軍節度使事上護軍潁川郡開國公食邑三千戶同修國史陳覺撰

昔如來居出世之尊。垂化人之道。闡揚大教。誘掖羣迷。開種種之門。方便雖陳於萬法。入圓圓之海。旨趣皆歸於一乘。然而顯教密宗。該性含相。顯之義派分五教。總名素怛攬。密之部囊括三藏。獨號陀羅尼。習顯教者。且以空有禪律而自違。不盡究竟之圓理。學密部者。但以壇印字聲而爲法。未知祕奧之神宗。遂使顯教密教。矛盾而相攻。性宗相宗。鑿枘而難入。互成非毀。謗議之心生焉。竟執邊隅。圓通之性惜矣。向匪至智。孰融異端。事必有成。人能弘道。今顯密圓通法師者。時推英悟。天假辯聰。髻戴禮於名師。十五歷於學肆。參禪訪道。博達多聞。內精五教之宗。外善百家之奧。利

名不染。愛惡非交。既而厭處都城。肆志嚴整。積累載之勤悴。窮大藏之淵源。撮樞要而誠誦在心。剖義理而若指諸掌。以謂所閱大小之教。不出顯密之兩途。皆證聖之要津。入真之妙道。覽其文體則異。猶盤盂自列於方圓。歸乎正理則同。若器室咸資於無有。而學者妄生異議。昧此通方。因是錯綜靈編。纂集心要。文成一卷。理盡萬途。會四教總歸於圓宗。收五密咸入於獨部。和乳酪之味。都作醍醐。采雲霞之滋。並爲甘露。誠諸佛之會要。爲後人之指南。使披覽者似獲隨意之珠。所求皆遂。遵依者如餐善見之果。無疾不瘳。覺學愧荒虛。辭非華麗。曾因暇日。得造吾師。每親揮麈之談。頗廣窺斑之見。屬當傳世。爰託撰文。素慚舒理之能。聊著冠篇之引。

顯密圓通成佛心要集卷上

五臺山金河寺沙門道殿集

原夫如來一代教海。雖文言浩汗。理趣淵冲。而顯之與密。統盡無遺。顯謂諸乘經律論是也。密謂諸部陀羅尼是也。爰自摩騰入漢。三藏漸布於支那。無畏來唐。五密盛興於華夏。九流共仰。七衆同遵。法無是非之言。人析修證之路。暨經年遠。誤見彌多。或習顯教。輕誣密部之宗。或專密言。昧顯教之趣。或攻名相。鮮知入道之門。或學字聲。罕識持明之軌。遂使甚深觀行。變作名言。祕密神宗。翻成音韻。今迺不揆瑣才。雙依顯密二宗。略示成佛心要。庶望將來。悉得圓通。故依教理。略啓四門。一顯教心要。二密教心要。三顯密雙辨。四慶遇述懷。

已下四段之中。爲避文繁。或暗用聖教。或義引經文。覽者應知。

且初顯教心要者。謂賢首清涼共判如來一代時教。而有五種。一小乘教。

謂阿含等六百餘卷。經。婆沙等六百餘卷。論。說一切法從因緣生。明三界不安。了人空真理。修自利之行。忻小乘之果。二大乘始教有二。一法相宗。謂深密佛地等數十本經。瑜伽唯識等數百卷。論。說一切法皆是唯識。了二空真理。修六度萬行。趣大乘佛果。於中多談法相之義。二無相宗。謂諸部般若等千餘卷。經。中百門等數本。論文。說一切法本來是空。無始迷情妄認爲有。欲證菩提以爲所得。修習萬行。於中多談無相空義。斯之兩宗。皆是大乘初門。故名曰始。始者初也。三一乘終教。謂法華涅槃等四十餘部經。實性佛性等十餘部論。說一切衆生皆有佛性。從本已來。靈明不昧。了了常知。無始迷倒。不自覺悟。欲成佛果。須先了悟自家佛性。後方稱性修習。本有無量妙行。多談法性。是大乘盡理之教。故名曰終。終者盡也。四一乘頓教。謂楞伽思益經文。達磨所傳禪宗。說一切妄相本空。真心本淨。

元無煩惱。本是菩提。唯談真性。不依位次成佛。故名曰頓。五不思議乘圓教。謂華嚴一經十地一論。全說毗盧法界。普賢行海。於中所有若事若理。若因若果。一具一切。重重無盡。總含諸教。無法不收。稱性自在。無障無礙。迴殊偏說。故名爲圓。此之五教。前前者是淺是權。後後者是深是實。若以圓教望之前四。皆是應根權施設也。今且據對待而論。言前四是權。圓教爲實。若定執圓教爲實。缺前四教。亦非圓暢。若五教俱傳。偏圓共讚。逗根方足。已下爲圓教中。具含前教行門。故不別說。

今依圓教修行。略分爲二。初悟毗盧法界。後修普賢行海。

且初悟毗盧法界者。謂華嚴經所說一真無障礙法界。或名一心。於中本具三世間。一切器世間。謂一切國土。二衆生世間。謂一切聖人。四法界。理事法界。三事

理無礙法界。四事事無礙法界。

一切染淨諸法。未有一法出此法界。此是一切凡夫聖人

根本之真心也。亦是根本之真身。

況言真心而有二種。一同教真心。二別教真心。

於同教中復有二種。一終教真心。二頓教真心。

且初終教真心者。故首楞嚴經云。當知虛空生汝心內。猶如片雲點太清

裏。況諸世界在虛空耶。

自家真心。猶如太清之天。十方虛空。喻似一片之雲。即知真心極大。虛空極小。虛空比於真心。尙爾

極小。況諸世界在虛空中耶。

又云。空生大覺中。如海一漚。發有漏微塵國。皆依空所生。

大覺。即是真心異名。真心廣大。猶如大海。虛空微小。似一浮漚。況諸國土。皆依虛空生耶。若比真心。即是小中之小。又云。真心徧圓。

含裹十方。反觀父母所生之身。如彼十方虛空之內。吹一微塵。若存若亡。

又云。不知色身。外洎山河虛空大地。咸是妙明真心中物。又云。一切世間

諸所有物。皆即菩提妙明真心。

既言皆即菩提妙明真心。非是世間諸法。在真心內。別有其體。即知盡法界。所有虛

空大地。情與非情。全是一味妙明真心。凝然清淨。不增不減。

一切衆生。從無始來。迷却此心。妄認四大

爲身。緣慮爲心。譬如百千箇澄清大海。不認。但認一小浮漚。

若了四大之身。緣慮之心。

緣生無性。全是真心。如了浮漚。緣生無體。全是海水。近有儒生。罕覽佛經。聞斯廣大真心。懵然未信。余尋喻云。此是如來親說。但是自心迷倒不見。

安得不信。且如俗書莊子云。北溟有魚。其名爲鯢。鯢之大。不知其幾千里。化而爲鳥。其名爲鵬。鵬之背。不知其幾千里。怒而飛。其翼若垂天之雲。將徙於南溟。水擊三千里。搏扶搖而上者九萬里。列子云。世豈知有此物哉。大禹行而見之。伯益知而名之。夷堅聞而志之。不可爲自目不親觀。亦不信有此物耶。俗書所說有相物情尙爾。何況如來所說。無相真心也。實性論云。翳居者不知宇宙之通泰。是也。

後頓教一心者。謂絕待一心。彌滿清淨。中不容他。一切妄相。本來是無。絕待真心。本來清淨。華嚴經云。法性本空寂。無取亦無見。性空卽是佛。不可得思量。起信論云。一切諸法。從本已來。離言說相。離名字相。離心緣相。畢竟平等。無有變易。不可破壞。唯是一心。故名眞如。謂前終教。隨衆生迷。說有色身山河虛空大地世間諸法。令諸衆生翻妄歸眞。了達色身山河虛空大地世間諸法。全是一味妙明真心。今頓教中。本無色身山河虛空大地世間諸法。本是一味絕待真心。故清涼云。總不說法相。唯辯眞性。卽知周遍法界。本是一味絕待真心。寂然清淨。不生不滅。不增不減。欲要易解。

周遍法界。喻似一顆瑩淨圓珠。朗然清淨。無影無像。無內無外。清涼云。照體獨立。物我一如。達磨云。我法以心傳心。不立文字。即傳此心。曹溪云。明鏡本清淨。何假拂塵埃。亦是此心也。一切衆生。從無始來。不了此心。妄見諸相。猶如眼病。橫見空華。圓覺經云。妄認四大爲自身相。六塵緣影爲自心相。譬彼病目。見空中華。若了真心。本無諸相。如虛空中。本無諸華。圓覺亦無身心。受彼生死。非作故無。本性無故。今頓教中。空華之喻。甚爲切要。今時縑素宗禪者。極廣。泊乎開示此心。多不入神。如葉公好龍。真龍現前。愕然不顧。若未悟此心。非是真禪。是故欲修禪行。先須了悟此一心也。

二別教一心者。謂一真無障礙大法界心。含三世間。具四法界。全此全彼。而無障礙。即知包羅法界。圓裹十方。全是一真大法界心。於此一真大法界內。所有若凡若聖。若理若事。隨舉一法。亦皆全是大法界心。乃至唯舉一塵。亦皆全是大法界心。華嚴經云。華藏世界所有塵。一一塵中見法界。

又一塵既是大法界心。於此一塵大法界內。復舉一塵。亦皆全是大法界心。若橫若豎。重重舉之。重重皆是大法界心。故清涼大師於華嚴十地品疏說。帝網無盡一心也。一切衆生。從無始來。迷妄不知無盡法界。是自身心。於中本具帝網無盡色心功德。卽與毗盧遮那身心齊等。却將自家無障無礙佛之身心。顛倒執爲雜染衆生。譬如金輪聖王。統四天下。身智具足。富樂無比。忽然昏睡。夢爲蟻子。於夢位中。但認己爲蟻子。不覺本是輪王。無盡法界之佛。世喻難况。今但喻迷真執妄之義。智者應知。是故欲求成就究竟佛果。切須悟此毗盧法界。若未悟此法界。縱經多劫。修習萬行。徒自勞苦。不得名爲眞實菩薩。亦不能生如來家故。華嚴經云。不了於自心。云何知正道。彼由顛倒慧。增長一切惡。清涼云。不依此悟。所作非眞。自爲修行。元來結業。此無盡法界一心。人首罕能知。知亦寡信。信亦鮮解。解亦難臻。此境。是以多劫菩薩。不信不解。上聲聞。如盲如聵。其有宿熏圓根。宜此註意。若能信悟在懷。當日生於佛

家。恐人難信。今舉例況之。如法苑珠林說。有一術人路行。見一人擔擔。上有籠子。可受升餘。告擔人云。我步行疲極。欲寄君籠子內。願相許耳。擔人慮是狂人。便語云。任君入耳。乃跳入籠子中。籠子非大。術人非小。擔之而行。也不覺重。行數十里。擔人於一樹下住食。乃呼術人共食。術人云。我自口有飲食。擔人視之。見籠中有種種器物。飲食已。其夫便睡。婦告擔人。我有外夫。欲來共食。夫若覺時。君勿道之。婦便口中出一丈夫共食。三人籠中全不逼窄。良久。其夫身動欲覺。其外夫告擔人云。且去。其婦即置外夫口中。重器物飲食。亦置口中。其夫覺已。復置婦在口中。云云。此是世間小術。尚爾勿要高推聖境。虛度一生者哉。

後修普賢行海者。既得了悟無障礙法界於自本心。於中本具十華藏世界微塵數相好。帝網無盡神通功德。與十方諸佛更無差別。柰無始局執妄情。習以性成。卒難頓盡。致令自家神通功德不能盡得自在受用。故須稱自家毗盧法界。修本有普賢行海。令無盡功用。疾得現前。華嚴經云。修此法者。少作功力。疾得菩提。雖普賢行海浩瀚無涯。一藏教中所說行門。皆是華嚴普賢之行。

但應權淺根宜支流也。

今就觀行略示五門。一諸法如夢幻觀。二真如絕相觀。三事

理無礙觀。四帝網無盡觀。五無障礙法界觀。

且初諸法如夢幻觀者。

即當事法界觀。

謂常觀一切染淨諸法全體不實。皆如夢

幻。此能觀智亦如夢幻。華嚴經云。譬如夢中見種種諸異相。世間亦如是。

與夢無差別。又云。度脫諸衆生。令知法如幻。衆生不異幻。了幻無衆生。又

金剛經云。一切有爲法如夢幻泡影。如露亦如電。應作如是觀。肇公云。虛

兮妄兮。三界不實。夢兮幻兮。六道無物。一切衆生從無始來。執一切法而

爲實有。致使起惑造業。循環六道。若常想一切名利怨親。三界六道全體

不實。皆如夢幻。則愛惡自然淡薄。悲智自然增明。

此夢幻觀。圓覺疏中名起幻消塵觀。天台名假

觀。亦名方便隨緣止。謂分明鑒照曰觀。寂然不亂曰止。即觀中便有止。止中便具觀。乃止觀雙運也。餘諸止觀。准此解之。

若人雖信解圓教而煩惱厚重。不能習得此夢幻觀者。應作不淨觀。謂

觀身五種不淨。一種子不淨。謂父精母血赤白二色和合成故。智度論云。是身種不淨。非餘妙寶物。不由白淨生。但從穢道出。二住處不淨。謂在母腹中生臟之下。熟臟之上。不淨流溢。汗穢充滿。彼中住故。又海山云。不淨乃作衣裝。汗穢便爲飲食。三自體不淨。謂三十六物。皆是不淨。共和合故。言三十六者。外有十二。髮毛爪齒垢汗大小二遺。眵淚涕唾。次有十二。皮膚血肉肪膈腦膜骨髓筋脈。中有十二。心肝膽肺脾腎腸胃生臟熟臟赤痰白痰。卽知從頂至足。皆是不淨。永嘉師云。革囊盛糞。膿血之聚。不淨流溢。蟲蛆住處。鮑肆廁孔。亦所不及。四自相不淨。謂九竅常流諸穢惡故。言九竅者。兩耳出垢。兩眼出眵淚。兩鼻出膿涕。口出涎唾。大便道出屎。小便道出尿。智度論云。種種不淨物。充滿於身中。常流出不淨。如漏囊盛物。五究竟不淨。謂命終身壞。脞脹臭穢。膿血蛆分。

不堪近故。天台云。從足至頭。從頭至足。循身觀察。唯見臙脹壞爛。大小便道蟲膿流出。臭劇死狗。心地觀經云。應觀自身臭穢不淨。猶如死狗。金光明經云。我從久來恃此身。臭穢膿流不可愛。雖常供養懷怨害。終歸棄我不知恩。觀自身竟。復觀他人。若男若女所有之身。皆具五種不淨。乃至觀一切世間有情之身。皆是不淨。故起信論云。應觀世間一切有身。悉皆不淨。種種穢汗。無一可樂。既觀皆是不淨。貪愛之心自然不起。阿含經說。昔有國王嗜欲無厭。有一比丘以偈諫曰。目爲眵淚窟。鼻是穢涕囊。口爲涎唾器。腹是屎尿倉。但王無慧目。爲色所耽。荒貧道見之惡。出家修道場。天台云。雖觀不淨。能成大事。如海中屍。依之得度。或作骨鎖觀。應先觀想自身額上。皮肉爛墜。唯見白骨。漸漸從狹至寬。想於一頭。皮肉爛墜。見於白骨。乃至全身。皆見白骨。既見自身一具骨。

鎖分明現已。復觀餘人爛墜亦爾。觀第二具已。漸次觀於一房一寺一城一國。乃至遍地。以海爲邊。骨鎖充滿。爲令觀心增長。復却從寬至狹。漸略而觀。唯見一國皆是骨鎖。漸見一城一寺一房一具。又於一具中。乃至漸漸唯見眉間少許白骨。見眉間已。專注一緣。湛然而住。如是修習。乃至得定。此觀成就。一切貪愛自然消亡。

或作數息觀。應從淺至深次第進修。先須調和自家氣息。不澁不滑。專注一心。數出入息。先數入息。後數出息。從一至十。終而復始。想心在數。不令散亂。若覺自心不假功力。任運從一至十。住數息中。然更一心隨息出入。若息入時。心乃隨之。從鼻至喉。從喉至心。膈臍髀脛。乃至脚指。若息出時。心亦隨之。息出離身。爲至一搥一尋等。一心恆隨息之出入。若覺心息任運相依。然更繫念唯在眉間。或在鼻端。安止其心。觀息住。